

Chó-hā-pông ê ki-bah pí iū-hā-pông ê sī têng-pē kâu; òe kiu ê lát iáh sī têng-pē. Chó iū ê hā-pông lái-bīn ê khang-khak tōa sòe chha-put-to píⁿ, òe tóe-tit huìh chha-put-to chít niú ê chōe.

Lūn sim tín-tāng.

67. Sim ê ki-bah chít-ē kiu, chít-ē pàng, tui láng chhut-si kàu sí put-si án-ni, lóng bô thêng chít kek á kú. Sim nā thêng-hioh chiū sí. Sim ê tín-tāng lóng chiàu chhù-sū, chiū-sī nng ê siōng pōng tãi-seng kiu chít-ē lái pek huìh lóh hā pōng, jiân-āu nng ê hā-pōng chia kiu pek huìh jip mèh-kng, āu-lái sim chiū hioh khah bô pòanⁿ biáu cheng ê kú. Tng hioh ê sí huìh òe tui sim gōa sūn-sè lâu jip nng pêng ũ khang-khak ê siōng-pōng, sim sùi-si chiū koh kiu chít ē huìh têng-chài siū pek tui siōng-pōng lóh hā-pōng. Teh kiu ê sí kap teh hioh ê sí chí nng chām píⁿ-píⁿ kú, chiū-sī 4 biáu cheng.

Lūn sim ê siaⁿ.

68. Sim phók chít-ē láng òe thiaⁿ-kiⁿ hit ê siaⁿ ũ nng iūⁿ. Hī-khang nā àⁿ-lòh heng-chêng chiū òe thiaⁿ-kiⁿ lái-bīn nng ê siaⁿ chiū-sī sim teh phók ê siaⁿ. Tãi-seng thiaⁿ-kiⁿ khah bān koh tng ê siaⁿ chiū-sī huìh chhiong sim-pōng ê mng-hō, mng khui ê siaⁿ; tē jī siaⁿ sí khah kín koh té ê chiū-sī huìh tui mèh-kng í-keng keng-kè pòan góat mng chiū koaiⁿ ê siaⁿ, án-ni òe thiaⁿ-kiⁿ sim teh phók nng hō siaⁿ jiân-āu chiū hioh 4 biáu cheng ê kú.

Lūn-méh.

69. Sim-pōng kiu liáu-āu piàn seng-khu ê mèh-kng liām-piⁿ ũ huìh chhiong-móa, só-í mèh saⁿ sòa phók hit ê kín-bān kap sim ê phók saⁿ tâng.

Ū kúi-nā só-chài mèh-kng phú khah chhut tī phē ē-tóe, nā bong chiū òe chai mèh-kng teh kí-lòh, teh tín-tāng. Tī chhiú-óaⁿ píⁿ kap pìn-piⁿ òe bong mèh chai í ê kí-lòh kap sim ê kiu-pàng saⁿ ìn-tap; mèh khah kün tī sim chiū khah tãi-seng tē í kí-lòh, lī sim khah hng chiū khah lō-bé.

70. Sim-phók kap mèh ê khoán-sit bô tiāⁿ-tiòh, ũ ióng-lám kín-bān ê cheng-chha, í-kíp lám-hū ló-iù ê bô tâng. Chít láng ê kín-bān bô siōng-siōng sio-tâng, chiū-sī chiàu seng-khu ê ióng-lám lái piàn-ōaⁿ í ê mèh, tui án-ni í-seng bong mèh òe chai seng-khu kúi-nā hāng tãi-chi.

Chiàu pêng-siōng tak láng ê mèh-kó chít hun cheng ê tiōng-kan phók 72 ē, chóng-sī ũ láng khah kín ũ láng khah bān. Koh eⁿ-á put-chí khah kín, 4 hē ê gín-á chha-put-to 100 ē. Lâu láng khah bān tām pòh iok-liòk 65 ē. Láng teh khùn ê sí mèh phók khah bān, nā-sī chhut-lát chòe kang á-sī cháu sī khah kín.

Siat-sú chít láng ê sim chít hun cheng ê tiōng-kan phók 70 pái chiū-sī chít jít 100800 pái, tak ní 36792000 pái. Sim sui-jiân bô thêng hioh m kú kai-chài tī chít phók chít phók ê tiōng-kan òe hioh 4 biáu ê kú, só-í tī chít ní ê tiōng-kan kiōng hioh 14716800 biáu ê kú chiū-sī 170 gōa jít ê kú.

Lūn seng-khu ê sio-lō.

71. Huìh teh liú-hêng m nā òe iúⁿ-chhi seng-khu, ũ koh chít hāng iàu-kín ê kong-iōng chiū-sī ũ koan-hē tī seng-khu sio-lō ê chiat-chè. Eñg hân-sú-chiam kām chhùi-lái chiàu

pêng-siông hân-sú-chiam lâi hit tiâu súi-gûn òe khí kàu 98.4 tō, put-lūn kôaⁿ-jòah lóng òe án-ni, só-í thang chai seng-khu ê sio-lō bô koan-hē thiⁿ sî jòah á kôaⁿ, sî tùi lâi-bīn hoat ê. Lâng kôaⁿ-thiⁿ chhēng saⁿ khah chōe, sím-mih iân-kò? M̄ sī saⁿ pún ũ sio tī-teh, put-kò sī pau-bát seng-khu ê sio-khì, hō i bián-tit cháu chhut gōa-bīn. Siat-sú lâng í-keng sí sui-jiân ēng saⁿ chōe-chōe niá hō i chhēng iā bōe sio, eng-kai tiòh óah ê seng-khu chiah òe sio.

72. Oáh lâng ê seng-khu thang ēng hé-lô lâi pí-phēng i. Sui-bóng bô khòaⁿ-kìⁿ hoat hé á-sī kng, iáu-kú seng-khu só hoat ê sio-lō kap hé-lô hoat sio n̄ng hāng ê lí tōa-tōa saⁿ-tāng. Hé-lô tiòh khiàm-ēng mih sio, kiám-chhái chhâ á-sī chóa á-sī thòaⁿ, koh eng-kai tiòh ũ khong-khì ê íong-khì tī-teh chiah òe tòh. Chhâ chóa thòaⁿ ták ê hām thàn tī-teh, hit ê thàn kap íong-khì òe saⁿ hòa háp lâi chiáⁿ n̄ng hāng, (1) òe hoat sio, (2) òe hoat thàn-íong-khì, koh sio liáu só chhun ê hé-hu chiū-sī bōe koh sio-tit ê mih. Seng-khu iā sī chhin-chhiūⁿ án-ni, só chiáh ê mih chōe-chōe hām thàn tī-teh. Lâng teh hō-khip put-sí òe tit-tiòh íong-khì jip hi sòa jip huìh. Chí n̄ng hāng ũn-ũn-á saⁿ hòa háp tī seng-khu ták pō-ūi lâi hoat sio kap thàn íong-khì. Lâng bô chiáh òe gō-sí sī chhin-chhiūⁿ hé-lô bô thiⁿ chhâ á thòaⁿ òe hoa-khì. Lâng bô chhóan-khùi chiah òe sí sī chhin-chhiūⁿ hé khâm-bát khong-khì bōe kàu chiah òe sit.

73. Oáh ê seng-khu kap hé-lô koh chit hāng saⁿ-tāng chiū-sī òe chòe kang. ũ sī lâng khí hé-lô tiâu-kang beh hiáⁿ chúi thang tit-tiòh hé-ian lâi pek hé-chùn, hé-chhia á-sī pát hō chhia-lún. Seng-khu iā sī án-ni, lâng chiáu pêng-siông tit-tiòh bí-niū chiū òe chhut-lát tín-tāng chòe kang, nā bô chiáh chiū òe soe-lám bōe chòe kang, sī chhin-chhiūⁿ hé-chùn bô thô-thòaⁿ chiū bōe kiáⁿ. Lâng ēng ki-bah kiáⁿ cháu á-sī chòe kang, ki-bah tiong pí seng-khu pát ũi khah sio; tùi án-ni thang chai hoat sio-lō kap chòe kang saⁿ koan-siáp.

Lūn seng-khu sit-lòh sio.

74. Seng-khu ũn-ũn-á sit-lòh sio sī àn phê kap kōaⁿ, koh só hō-chhut ê khi iā òe tōa sio-khì lī-khui seng-khu. Chhì hō-chhut chit ē tī ka kī ê chhiú chiū òe chai sio. ũ sī lâng jiát-pīⁿ chīn tāng hiám-hiám sí, i-seng òe hoan-hù ēng léng-chúu chìm, ì-sù beh hō sin-thé ê sio-jiát àn phê tháu-chhut lâi kiù sīⁿ-miá.

75. Seng-khu ê sio-lō kap huìh-ũn sím-mih koan-hē? Jòah-thiⁿ ê sî phê-ē ê huìh-kng chhun khah tōa tiâu, íong-ún khah chōe huìh tī phê-ē. Huìh án-ni óa phê-bīn khah òe sit-lòh sio tháu-chhut gōa-bīn chiū seng-khu ê sio-lō khah kiám chió. Koh phê-ē ê huìh khah chhiong-móa ê sî phê ê kōaⁿ-chóaⁿ òe sīⁿ kôaⁿ khah chōe. Án-ni jòah-thiⁿ ê sî hó-hó ê seng-khu ēng chí n̄ng ê hoat-tō hō jiát-tō bián khah kôaiⁿ pêng-siông ê, chiū-sī 98.4 tō.

Kôaⁿ-thiⁿ ê sî sī tùi-hóan, chiū-sī phê-ē ê huìh-kng sok khah sòe tiâu hō phê-ē ê huìh khah kiám chió, án-ni khah bōe sit-lòh seng-khu ê sio-lō, hóan-tng kò-siú i tī lâi-bīn. Koh kôaⁿ-thiⁿ in-ūi phê-ē ê huìh khah chió, só-í lâu kōaⁿ iā khah chió.

Kôaⁿ-thiⁿ ê sî ũ lâng ài chiáh chiú, in-ūi kóng chiú òe ke-thiⁿ seng-khu ê sio. Nā siông-sè siūⁿ chiū chai chit ê m̄ sī sít-sít ê lī-ek. Chiáh chiú liáu-āu phê òe khah sio, lâng chiām-sī chai khòai-lòk, nā-sī hit ê sio tùi tah-lòh lâi? Kiám m̄ sī tùi lâi-bīn lâi kàu phê, jiân-āu òe àn phê tháu chhut phê gōa lâi sit-lòh mah? Pak-hng kék kôaⁿ ê sî bat ũ lâng chiáh chiú liáu